



Nuuk martsip 31-at, 2010

## **Nunarput tassaavoq illoqarfinni nunaqarfinnilu inoqarfiusoq**

Naalakkersuisooqatigiittut partiiannit Demokratinit oqaatigineqartartoq aammalu maanna GA-mit nalunaarutigineqartoq nunatsinni nunaqarfiit isorliunerusullu aningaasarsiornikkut nanertuutaaginnarneri peqqutaallutik siunissami atuukkunnaartinnissaanik anguniagaqartoqartariaqartoq aammalu nunatta aningaasatigut imminut napatissinnaanera taama isiornikkut anguneqarsinnaanerarneqartoq.

Inuiaqatigiinni ingerlatsinermi illoqarfiit suut aammalu nunaqarfiit suut imminut akilersinnaangitsut suullu akilersinnaasut aallaavigalugit ingerlatsisoqarsinnaangilaq.

Inuiaqatigiinni katitingaarneput piviusoq aallaavigalugu sulissaagut. Qanorluunniit oqaluttoqaraluarpat inuiaqatigiit imatut katitigaavugut ilavut nunaqarfimmiuupput ilavullu illoqarfimmiuullutik. Tassa piviusoq.

Inuiaqatigiinni naalakkersuinikkut ingerlatsinermi inuiaqatigiittut pisussaaffik pingaarneq tassaavoq inuiaqatigiit qanorluunniit katitingaagaluarutta aammalu sumi najugaqaraluarutta tamatta inuiaqatigiinnut ilaasutut, ineriartoqataasutut, innuttaaqataasutut pingaartinneqartutullu sullinneqartussaavugut. Kikkut sumi najugallit imminnut akilersinnaangitsut aammalu kikkut imminnut akilersinnaasut aallaavigalugu oqallineq siunnerfeqangilaq.

Nunat piorsarsimasutut isigisut innuttami akilersinnaasutut akilersinnaangitsutullu isigalugit immikkoortiterisumik ingerlatsineq ajorput. Nunarsuarmi suna nuna tusarneqarsimanerpa tamarsuarmik nunaqarfii illoqarfiilu imminut akilersinnaasuinnarsuarmik ingerlatsiviusut?

Nunap aningaasarsiornerata ineriartortinnerani nuna tamakkiisoq isigalugu ineriartortitsisoqassaaq aammalu periarfissat atorluarnerisigut piffinni aaliangersimasuni avaqqunneqarsinnaangilaq ilai ingerlalluarusartut ilaalu ingerlalluanninnerusartut, taamaakkaluartoq ingerlatsiniarnermi nunap innuttaanik ataqqinnittumik, mianerinnittumik, peqataatitsisumik aammalu periarfissiisumik ineriartortitsinissaq ingerlanneqartariaqarpoq.

Aleqa Hammond  
Siumup siulittaasua  
Tel.: 49 23 09

